

FC Twente mester cera parti di stadion pa partido di Europa League despues di investigacion riba racismo

(NLTimes) – FC Twente a ricibi un castigo severo di UEFA pa comentarionan racista y discriminatorio durante nan partido den UEFA Europa League contra SS Lazio.

Imagennan di video a muestra hala di Lazio, Loum Tchouaoua kehando na e banki di e team tocante e racismo, despues cu a substitue den e partido.

E club di Enschede tin cu cera un parti di su stadion pa fanaticonan den su proximo partido den e competencia

contra banda Belga, Union Saint-Gilloise dia 28 di november. E club tambe a ricibi un multa di 83,125 euro pa e suceso durante e partido contra Lazio, cu a inclui hende den tribuna tirando cup riba e cancha y desplegando un banner ofensivo.

“Segun UEFA, a keda estableci cu sostenedornan a trata un hungador di Lazio den un manera racista y discriminatorio durante e perdida 0-2. Desafortunadamente, investigacion interno ta confirma esaki. Ta tristo cu esaki a sucede na nos stadion. E com-

portamento aki ta inaceptable, no merecedor di FC Twente, y ta afecta nos tur profundamente,” manager general Dominique Scholten a bisa riba website di e team.

“E impacto cu esaki tin riba e sostenedornan cu bon intencion, hungadornan y personal ta enorme. Nos ta haciendo tur loke nos por pa track down e culpablenan, castiganan y recupera e [placa di e] multa for di nan. No tin lugar den nos stadion pa hende cu ta desplega e comportamiento aki.”

Informacion specifico tocante riba cua tribuna ta bay aplica e castigo lo sigui for di UEFA, e club a declara.

A keda confirma cu parti di nan seccion di sostenedor fanatico, Vak-P, ta bay ta cera durante e partido.



Landado legendario local Deaxo Croes a inspira durante “AHATA Excellence Awards 2024”

AHATA Excellence Awards 2024 organisa pa Aruba Hotel & Tourism Association tabata tin e honor di presenta, Deaxo Croes, landado di distancia largo den awa habri, como Keynote Speaker di e gran evento. Conoci pa su logronan extraordinario den landamento, Deaxo a comparti su trayecto pa excelencia, captivando mas di 250 invitado cu su storia di perseverancia, resiliencia y dedicacion.



Deaxo Croes, ta e unico per-

sona den nos historia local cu a landa di un pais pa otro

den dos diferente ocasion, di Venezuela pa Aruba y di Bonaire pa Curaçao. E insights di e atleta su experiencia personal, ta algo cu a resona cu e audiencia y a conecta cu e aspiracion pa excelencia den tur ramo y profesion. Su presentacion a ilustra aspectonan clave di su trayectoria como landado, incluyendo entre otro e importancia di planifica metanan cla, e disciplina necesario den practica y preparacion, formacion di un ekipo, con pa enfrenta y

supera retonan, y comparti e victoria di cada logro. AHATA ta extende un danki na Deaxo Croes pa relata su tremendo storia cu claramente a captiva tur invitado cu inspiracion y vigor nobo pa sigui resalta y alcanza excelencia den nan bida personal y nan trabou indispensable den turismo. Como simbolo di gratitud, Tisa LaSorte, CEO di AHATA, a regala Deaxo Croes un cuadro relevante y bunita di artista local, Armando Goedgedrag.

Accentuando e importancia di bon maneho den eventonan deportivo

Tayer di “Event Management” di gran interes pa nos federacionnan local

Diamars anochi ultimo den auditorio di EPI na Oranjestad, e di 8 les di e “Capacity Building Training” a tuma luga. Den e les aki, a toca e tema di “Event Management”, pues con ta haci e operacionnan necesario pa organisa un evento. Capacitando e cursistanan e siman aki ta Sra. Tita Iglesias cu ta traha na Aruba Tourism Authority como “Events & Sponsorships Specialist”.

Tita sigur ta un persona bon conoci den e mundo di turismo y eventonan na Aruba, unda su persona por ehempel ta lidera e grupo cu a organisa e evento culinario “Autentico” cu recien a mira gran exito y mas relevante pa nos cursistanan, ta forma parti di e ekipo encarga cu e evento “Beach Tennis Open” cu ta tuma luga den luna di November.



A pesar cu e tema sigur ta uno cu ta rekeri hopi tempo y atencion debi na su complejidad, a prepara tres punto di interes cu a ser cubri den e les aki. Primeramente a papia tocante planifica y organisa eventonan competitivo, unda mester tene na cuenta e aspectonan tecnico di e deporte cu lo forma parti di evento aki.

Esaki ta encera compronde e

deporte, e formato den cual e evento lo tuma luga, y con esaki lo por afecta e planificacion y checucion di evento. Siguiendamente, a papia riba e parti di logistica, unda aspectonan manera e sitio unda evento lo tuma luga, e ekipo necesario pa por haci e evento y e proceso di registracion mester wordo analisa. Aki tambe a tuma tempo pa splica e importancia di mancha y tin bon relacion cu e dife-



rente “vendors” cu lo forma parti di e evento cu bo lo organisa. Finalmente, un tema cu sigur ta hopi importante pa tur federacion, a papia tocante e maneho di boluntarianan. Tur federacion ta depende di boluntarianan pa logra organisa nan eventonan y un bon maneho di esaki por yuda den retene e boluntarianan pa mas evento y crea caminda pa capacita nan pa asina brinda algo a cambio di nan ayudo y alabes crea boluntarianan di mas balor

agrega. E les aki a berdaderamente capta e atencion di tur presente, y a gradici Sra. Tita Iglesias pa su presentacion dinamico, cu a inclui hopi casonan actual y relevante, asina treciendo e tema mas cerca di nos cursista presente. Manera na final di tur les, a duna Tita algun regalo di aprecio, entre otro e pechi oficial, e buki di e atletanan Olimpico y un pin di COA, y a yam’e bon bini den famia di Comité Olimpico Arubano.